

**1271-1271- OFP - Acta Capitulum Generalium apud Montempessulanum Celebrati**

In nomine patris et filii et spiritus sancti. Amen.

Acta capituli generalis apud  
Montempessulanum celebrati anno Domini  
· M<sup>o</sup> · CC<sup>o</sup> · LXXI<sup>o</sup> ·

Confirmamus has constitutiones. In capitulo de electione prioris conventualis. ubi dicitur. post duos annos. deleatur. duos annos. et dicatur. · iiiior · annos. Et hec habet · iii · capitula.

Item hanc. In capitulo de studentibus. post illud. ubi studium viget generale. addatur. extra suas provincias. de diffinitorum capituli provincialis. vel maioris partis eorum consilio. et assensu. nisi aliquem missorum studencium infra · vi · menses a tempore celebrati capituli mori contigerit. vel alias impediri. Et hec habet · iii · capitula.

Item hanc. In capitulo de visitoribus. ubi dicitur. si qua autem gravia et periculosa invenerit. addatur. emersisse a tempore visitacionis ultimo facte per visitatorem precedentem. Et hec habet · iii · capitula.

Item hanc. In capitulo de ieiuniis. ubi dicitur. nisi dies natalis domini ea die evenerit. usque ibi. vel precipuum. deleatur totum et dicatur sic. quadragesimali utimur cibo. nisi in dictis · vi · feriis cum aliquo propter laborem dispensetur. vel in locis in quibus eisdem · vi · feriis aliter comederetur. vel etiam nisi precipuum festum fuerit. Et hec habet · iii · capitula.

Item hanc. In ordinario in rubrica misse dominice in ramis palmarum. post illud. nec signent se fratres. addatur. cum ille qui legit passionem pronunciaverit. emit spiritum. sileat. et totus chorus prosternat se super formas. devote gracias agens redemptori. donec facto signo a prelato surgat chorus. et lector prosequatur passionem. Idem vero fiat in aliis passionibus. ubi dicitur. expiravit. vel tradidit spiritum. Et hec habet · iii · capitula.

Approbamus hanc. In capitulo de electione prioris provincialis. ubi dicitur. mortuo priore provinciali vel amoto. prior qui eius locum optinet. etc. deleatur totum usque ibi. transferatur. et dicatur sic. mortuo priore provinciali vel amoto. qui eius locum optinet. teneatur convocare quam cicius poterit electores. et in die ad eligendum assignata prior provincialis eligatur. vel postuletur. et provinciale capitulum celebretur. nisi prius fuerit celebratum. quod si in die statuta non elegerint. vel postulaverint. qui debent eligere; potestas providendi ad magistrum ordinis transferatur. Et hec habet · ii · capitula.

Item hanc. In capitulo de electione prioris conventualis. ubi dicitur. si ei visum fuerit. confirmetur. deleatur totum quod sequitur usque ibi. conventus autem qui fecerit. etc. et dicatur sic. idem etiam fiat si aliquis a maiori parte illorum ad. quos spectat electio. de aliquo conventu fuerit postulatus. Et hec habet · ii · capitula.

Item. In eodem infra. ubi dicitur. si infra mensem non elegerint. addatur. vel postulaverint. Et hec habet · ii · capitula.

Item hanc. In capitulo de electione prioris provincialis. ubi dicitur. vicem eius optineat. addatur. quod si capitulum provinciale. ex aliqua causa. ad conventum alium transferatur; post translacionem. prioris vicarii potestas expiret. et prior loci illius ad quem capitulum translatum fuerit; vices provincialis optineat. Et hec habet · ii · capitula.

Item hanc. In capitulo de gravi culpa. ubi dicitur. caveat quilibet frater. ne proclamet in capitulo aliquem de crimine nisi possit probare. deleatur totum et dicatur sic. caveat autem quilibet frater ne proclamet aliquem in capitulo de crimine etiam de auditu; nisi ipsum crimen possit probare. Et hec habet · ii · capitula.

Item hanc. In capitulo de visitoribus. ubi dicitur. si aliquis visitor. antequam visitet. addatur. vel in ipsa visitacione. et ubi dicitur. in priorem confirmatus fuerit. vel mortuus. addatur. vel alias impeditus. Et hec habet · ii · capitula.

Item hanc. In capitulo de rasura. ubi dicitur. quarta inter purificationem et pascha. addatur. cum autem prolixitas temporis inter purificationem et pascha exegerit; addatur alia rasura. et tunc ille due intermedie fiant partito tempore. Et hec habet · ii · capitula.

Item hanc. In eodem capitulo. ubi dicitur · xiiia · in festo sancti Dyonisii. deleatur totum. et dicatur sic · xiiia · in festo sancti Michaelis · xiva · in festo sancti Luche · xva · in festo · iiiior · coronatorum · xvii · in festo sancti Andree. Et hec habet · ii · capitula.

Inchoamus has. In capitulo de electione prioris provincialis. in fine addatur sic. statuimus autem. ut in singulis provinciis priores provinciales instituant vicarios aliquos per totam suam provinciam; quibus certas domos visitandas et corrigendas assignent. vicarii in domibus sibi assignatis prioris provincialis nisi in eius presencia; plenarie gerant vices. exceptis duntaxat institucione et destitucione priorum et lectorum. Et isti vicarii ubique loca sua teneant. nisi in capitulo dum ab eis vicarie sue officium exercetur. qui etiam vicarii teneantur provinciali capitulo interesse. et tunc de corpore capituli existant. et dicti vicarii simul cum vicaria; non habeant officium prioratus. Hos autem vicarios priores provinciales instituant. de

diffinitorum capituli provincialis. vel maioris partis consilio et assensu. requisito nichilominus consilio priorum illius vicarie. que committenda fuerit; qui fuerint tunc presentes. Hos etiam vicarios priores provinciales possint corrigere. vel amovere. et si aliquem ex eis mori contigerit; prior provincialis alium loco ipsius usque ad provinciale capitulum; valeat subrogare.

Item hanc In capitulo de capitulo generali. in fine dicatur sic. capitulum generale uno anno. et capitula provincialia alio anno. et tercio iterum generale. et sequenti anno provincialia. et sic deinceps alternatim per annos succedentes; generalia et provincialia capitula celebrentur. Et quicquid contra sententiam huius constitutionis repertum fuerit in constitutionibus; per diffinitores tercii sequentis capituli removeatur.

Item hanc. In capitulo de electione prioris conventualis. post illud. sicut in electione magistri. addatur. vocatis tamen et expectatis. qui expectandi fuerint et vocandi. nec aliqua vocum commissio admittatur.

Item hanc. In capitulo de visitatoribus. ubi dicitur. generali capitulo studeant denunciare. deleatur. et dicatur sic. magistro et diffinitoribus capituli generalis studeat denunciare. vel priori provinciali et diffinitoribus provincialis capituli; si ibi generale capitulum non fuerit celebrandum.

Item hanc. In capitulo De itinerantibus. in fine addatur. si quis frater ordinis nostri. per se. vel per alium ordinationem de se. vel de alio fratre factam. vel obedienciam sibi. vel alii fratri iniunctam. per quamcunque personam extra obedienciam nostri ordinis constitutam. quocumque modo procuraverit revocari. vel in alia provincia. seu conventu. aut in officio. aut etiam studio generali poni. vel remanere. vel inde amoveri. vel cum personis extraneis commorari. ipso facto. ex vi presentis statuti. omni voce tam in accusationibus aliorum. quam in electionibus. et tractatibus eorum. que ad capitulum provinciale mittenda sunt penitus sit privatus. nec ad predicta restitui valeat. nisi per magistrum ordinis; vel diffinitores capituli generalis.

Item hanc. In capitulo de capitulo cotidiano. ubi dicitur. similiter quisque caveat. ne malum quod audivit. etc. deleatur totum usque ibi. auditis vero culpis. etc.

Item hanc. In capitulo de electione prioris conventualis. post illud. prior provincialis provideat conventui de priore. addatur. si autem prior provincialis aliquem fratrem a conventu aliquo electum vel postulatum non confirmaverit. secundo fratrem illum sine ipsius prioris provincialis licencia eligere. vel postulare non possint. quod si fecerint; potestas providendi de priore. ad provinciale capitulum devolvatur. Iste sunt admoniciones.

Volumus et monemus. quod priores conventuales diligenter inquireant. quociens. et quibus fratres iuvenes confitentur. et si eos invenerint notabiliter negligentes; certos confessores assignent.

Item. Declaramus. quod omnes fratres simul comedentes. sive in mari. sive in terra; silentium servare tenentur. excepto uno qui maior fuerit inter eos. et ita monemus et volumus observari.

Item. Caveant fratres. ne loquantur in mensa per infinitivos. vel alias oraciones incongruas. cum ibi loqui non liceat. nisi de necessariis mense. et per unicam oracionem breviter et submisse.

Item. Inhibemus prioribus et fratribus universis. ne famulos seculares in nostris domibus. commorantes. obligent insimul ad obedienciam. continenciam. paupertatem perpetuo observandam. cum hec tria personam faciant regularem.

Item. Monemus studentes. quod studio philosophie minus intendant. et in studio theologie se exercent diligenter. lectiones ordinarias. et sententiarum sollicite audiendo. et priores hoc diligenter faciant observari. studentes etiam in conventibus. ubi sunt. de hiis que ad studium non pertinent; non se plus quam fratres alii intromittant. 1

Item. Declaramus. quod priores conventuales in die tractatus eorum que ad capitulum sunt mittenda; electioni socii interesse non debent.

Item. Cum magister ordinis. de diffinitorum capituli generalis consilio et assensu. concesserit subprioribus et eorum vicariis. quod in die tractatus eorum que ad capitulum sunt mittenda. fratribus qui intersunt tractatui. precipere possint. ne prioribus revelent absolucionem ipsorum petentes. vel aliis. per quos possint ad ipsorum noticiam pervenire. de diffinitorum presentis capituli consilio. et assensu mandat et ordinat. ut ipsi subpriors. et vicarii ad eandem districtionem; a simili teneantur.

Item. Volumus et monemus. quod in die tractatus eorum. que ad capitulum sunt mittenda. subpriors. vel eorum loca tenentes. ubi scrutinium fieri contigerit. de absolucione. vel repetitione prioris. cum socio prioris. et altero fratre. seorsum in presencia conventus secreto vota singulorum audiant et conscribant.

Item. Inhibemus districte prioribus et fratribus universis. ne per personas ecclesiasticas. vel seculares. mutuo se impediri procurent. quominus accedere valeant causa predicacionis. confessionum. et questus; ad loca sibi ab ordine deputata.

Absolvimus priores; Lemovicensem. Baionensem. Narbonensem. Arelatensem. Figiacensem. Brageriacensem. Alestensem. Condomiensem. Montis Albani; Albenacii.

Concedimus Provincie · i · domum. provincie Theotonie; · i · Ungarie; · i · Dacie; · i · et ponantur ubi prioribus provincialibus et diffinitoribus capitulorum provincialium visum fuerit expedire. dummodo ponantur sine preiudicio aliarum provinciarum.

Ista sunt suffragia.

Pro venerabili collegio cardinalium. et statu universalis ecclesie. ut deus ecclesie de summo pontifice providere dignetur; quilibet sacerdos · ii · missas de spiritu sancto. Nichilominus tamen omnes fratres tam sacerdotes quam alii. singulis diebus usque ad creacionem ipsius summi pontificis; oracionem aliquam faciant specialem<sup>1</sup>.

Pro domino Prenestino cardinali defuncto; quilibet sacerdos · i · missam.

Pro domino rege Francie. et domino comite filio eius. et pro regina iuniore; quilibet sacerdos · iiiior · missas. Et ponatur in kalendario in crastino sancti Bartholomei. sic. eadem die obiit dominus Ludovicus illustrissimus rex Francorum. et hoc pronuncietur. quando kalende leguntur in conventu. etc.

Committimus magistro ordinis ordinacionem studii Parisiensis et aliorum studiorum generalium · iiiior · provinciarum. ut de ipsis in magistris. et baccalareis. et aliis ad studium pertinentibus; curam habeat diligentem.

Sentencias iudicum approbamus.

Sequens capitulum generale apud Florenciam assignamus in provincia Romana. et diffinitores ita veniant tempestive. quod sint ibi dominica infra octavas ascensionis.

Actis additae sunt litterae Philippi regis Franciae et magistri ordinis; cf. app. nn. XXI, XXII.

---

<sup>1</sup> Mortuo Clemente IV. (29 nov. 1268) sedes ap. vacavit ad 1 sept. 1271.